

柯山集附拾遺

六



柯 山 集

附 拾 遺

(六)

張 耒 撰

柯山集卷四十七

啟

答林學士啟

伏審光膺宸綽。進直蘭臺。榮命始行。儒林增重。竊惟館閣之選。蓋待儒學之臣。旣非典領之權。幾于冗散。又無議論之責。少補絲毫。宜非仕者之願居。而爲一世之所尙。蓋學問爲君子之事。職卑而待之不輕。詩書非俗士所知。祿薄而意則甚厚。雖厭居寂寞。夸者至謂之病坊。而脫略等夷。亦尉均稱于宰相。名旣如此。人猶貴之。而况將相之選。踵武相尋。祖宗以來。掄擇爲重。故本朝之寵儒者。雖他官必假此名。伏惟某官文麗而用長。才周而學富。父子濟美。兄弟有聲。行實著于家庭。經濟冠于朝右。冠豸彈擊。風霜凜然。攬轡按行。疑竇立解。已登進于卿棘。復入直于道山。豈專是正之功。實示超騰之漸。某淮楚晚進。場屋後來。辱登門牆。嘗備官屬。當趨風于末坐。乃首贅于長牋。爲禮則勤。循分而懼。孔鸞同列。忘魯鈍之卑飛。珠玉藏家。驚輝光于貧屋。永爲好也。何日忘之。

代人謝及第啟

困瑕疵于指玉。獻已過三。收奔敗以誓師。戰猶借一。僅能無辱。豈足言勞。伏念某受才樗疎。趨世迂闊。拙

無他技。幼刻意于藝文。家有遺風。世知名于科級。童子習雕蟲之技。已屢試于鄉邦。專門尙經術之科。曾再遊于禮部。一行作吏。終日坐曹。几硯已積于埃塵。詩書錯陳于朱墨。人耳人耳。頗羞請鑄之金。時哉時哉。思樂無求之雉。屬大明之繼統。仰衆正之來同。恥窮有道之邦。願列思皇之士。隨衆碌碌。僅乃有成。半世遑遑。所得如此。惟其無似。已合知榮。茲蓋伏遇某官。左右太平。設張治具。收才能于無間。本選舉于至公。刈楚旁及于艾。蕭濬川下通于溝澮。羞愧平津之策。絕意上游。庶幾毛遂之奇。收功下客。

潤州謝執政啟

比者伏奉告命。除直龍圖閣知潤州軍事。已于閏四月二十九日到任交割訖。伏以文章爲學者餘事。故先王不以經世富貴。非人力所制。故君子以爲在天。而况修詞塞淺。未涉作者之流。趨世闊迂。每在衆人之後。則其投閒置散。寔後跋前。在所當然。夫復何恨。伏念某羈旅一介。憔悴餘生。困筮楚者十年。追飢寒於斗祿。仕已成于漫浪。意何有于功名。始誤寘于成均。復進升于儒館。佐東觀之論著。頗見舊聞。紀先帝之事功。遂遊藏室。擢升右史。密侍清光。雖學儒之至榮。豈草茅之素望。而疾病侵耗。心力衰疲。分敢自安。義當引去。駑馬自竭。驥歷塊而已超。神山在前。風引舟而忽遠。尙叨便郡。獲養殘軀。靜循此恩。蓋有所自。茲蓋伏遇某官。曲成萬類。器使庶工。直鋪蒙鑿。疾者未嘗遽廢。大宋小桷。施之各以其宜。致此枵虛。未卽捐棄。獄訟希簡。職事不廢。乎詩書山林幽深。形骸頗爲之清快。庶餘齡之可養。幸沈痼之有瘳。仰報至恩。將必有在。

賀錢內翰啟

伏承內翰侍讀四丈。罷直內閣。升華禁林。解天府之浩繁。侍經帷之清燕。雖衆望所屬。理固當然。而成命既行。士以相賀。伏以學士號爲職親地要。實儒者之至榮。訓辭欲其言近指深。必文人爲充選。設官雖專于書詔。儲才常用于鈞衡。被選益艱。因人增重。雖從容入侍。獨高大白樂天之詞華。而論議經邦。復重德裕敬輿之術業。苟擅一長于此。皆爲稱職之才。洪惟本朝。繼有碩望。方當聖主之圖任。果見異人之來儀。伏惟某官。學總百家。才高一世。經守韋平之學。世登晁董之科。無施不長。所治皆最。批竇蹈𡇗。在庖丁如無牛。越國過都。于騏驥爲歷塊。隱然公輔之望。久矣。中外所期。俄聞異恩。大慰衆論。謀謨黼座。何慙天子私人。顧瞻玉堂。應歎吾家舊物。卽膺大拜。用究遠圖。某每愧庸虛。素承知獎。其爲欣快。實倍等倫。嘆白髮之侵陵。望青雲于寥廓。歲事已晏。德履多祥。更冀保頤。下副祝願。

宣州謝兩府啟

比者法當易地。恩使造庭。方奔命于半途。遽分符于使郡。地未殊于南北。舟楫相通。憂方切于困窮。廩祿有繼。雖徼幸出聖朝之厚。而曲成皆高位之仁。已見吏民粗知風俗。茲蓋伏遇某官。受天間氣。爲國元臣。道德致君。議論垂世。器衆材而無棄。慮一物之遐遺。遂令罔功。每輒得所。退觀所領。自昔有聲。道德在人。有顏真卿之政事。登高舊賦。稱謝元暉之文章。某素乏詞華。不通吏道。一無稱可。全有便安。民消愁歎之聲。自緣聖治。家受飽煖之福。徒費君恩。尺寸無施。冒昧而已。歲事云宴。幾政多閒。伏乞俯爲華夷精調。寢

味。

賀錢都尉啟

伏承光膺綸綍。雄領節旌。遠俗知榮。侯藩增重。其爲僚屬。益倍歡愉。伏以懿親建邦。粵古今典。惟盛朝尙王姬之貴。在一時皆妙選之才。旣內奉朝請。而爲國華。亦外假風聲。而持將鉞。屈天姻之華貴。尉南服之荒遐。民社有光。江山增氣。恭惟某官。朝推令德。世有美名。夙以才猷。膺茲選擢。忠孝著甲。昔受大賚之王封。簪笏滿門。今爲五世之卿族。聞望卓爾。寵祿從之。雖仰青雲之絕塵。亦受靈河之餘潤。優游美望。素欽武子之才豪。留務不煩。久服征南之恩信。歲事已宴。賢履有休。更冀保調。以綏戩穀。

謝鮑承務啟

伏審光臨民社。宣布教條。德庇所臨。愚陋知免。竊惟漢唐之盛。惟以守令爲難。或由郎而出宰邱民。或歷縣而入官華省。謂將責之經世。莫若試之臨人。恭惟聖朝。亦重茲選。凡膺民社之寄。莫非慈惠之師。伏惟某官。炳蔚多文。淵源博學。行已信于鄉里。名久播于搢紳。素懷製錦之良能。方展割雞之利用。略攄素業。均惠遠民。牒訴雖繁。敦本可使無訟。鰥寡未乂。有政爲善養人。雖君子之徽猷。蓋高才之餘事。况復江山清遠。民物阜安。獄訟多餘。樽俎可樂。莫陪談笑。徒竊傾馳。過此以還。未知所措。

賀廣德知軍啟

伏以星回于天。旣發春而獻歲。帝出乎震。方去故而就新。天時于是更端。賢者受其介福。伏惟某官。風猷

強敏。道義深純。度越衆人。獨立一世。烏臺彈擊。轂千鈞之弩而發機。山郡剗裁。持屠牛之刀而破蝨。惟其道用。煥然日新。俯同世人。仰受天福。

謝建平知縣啟

茲者過沐殊私。特貽盛禮。一日之長。託末契之光華。通家之歡。傷前人之零落。俛跪之際。感喜交并。伏惟某官。文學承家。吏能絕俗。一見許論于家世。並遊遂列于弟兄。昔日桑弧。交慶兩家之生子。相逢樽酒。共驚五十之幾年。敢不傳義好于子孫。謹銘藏于肺腑。過此以往。未知所裁。

賀太平知州啟

伏承輟講經帷。剖符江國。餘光所芘。弱植知安。伏惟某官。奧學造微。高行絕衆。赫奕家世。照臨遠方。清淨道心。消鎮浮俗。遙想公餘之多暇。未妨禪觀之無爲。出入起居。輕利安穩。某夙懷問道。幸託爲鄰。惟仁人志常在民。自今日請學爲政。雖相聞雞犬。實一葦可航之川。而坐困簡書。有其人甚遠之歎。顧茲傾素。曷罄敷陳。

上黃州郡守楊懷寶啟

某愚暗觸禁。懵不自知。仁聖至明。罰惟當罪。雖從黜責。尙得依歸。平生京洛之遊。交情有素。千里江山之別。老境已侵。豈知投竄之餘。忽有笑談之便。淋漓醉舞。坐沉痾而少衰。慷慨悲歌。撫壯心而猶在。靜言思咎。亦旣戒行。忽忘跋履之勤。喜遂瞻依之素。伏惟某官。天資拔俗。國器冠時。利刃吹毛。長劍耿介。倚天外。

高標絕衆。野鶴昂藏。在雞羣。擅風流獨步之名。有雍容甚都之觀。左挽繁弱。邁越石之奇。一割牛心。兼武子之逸。蓋嘗奉使諸部。固已著迹本朝。賦吳郡之溪山。醉金陵之風月。遺愛猶在。陳迹可尋。屈臨方州。實幸遠俗。某去國流浪。多病變衰。流水高山。知者益寡。附輿執轡。今也則亡。雖無聊遠竄之可憐。得相逢一笑。而何恨。私用自賀。夫復何言。春序正暄。更祈保衛。

賀潘奉議致仕啟

伏審親家。致政奉議。上還印綬。退卽里閭。已私知止之安。將受永年之福。凡居親舊。實助忻愉。竊以人之多難。在于儒者尤甚。壯年講學。謂富貴利祿之可期。小試多違。信功名遇合之有命。加以歲月荏苒。時不待人。顧瞻簪裳。義則當止。彼貪冒無恥者。率皆優佚而老。惟進退顧義者。不免飢寒之憂。未餘漢庭之賜金。復休故社之喬木。追計宦遊之廩祿。何有一毫。復與平生之簞瓢。相從三徑。莫非命也。謂之何哉。伏惟某官。與學淵源。懿行金玉。久栖遲于末路。遂高退于明時。清譽益隆。多祥有在。某自憐罪戾。久困泥塗。延企高風。但懷景仰。

答楊州司法謝薦啟

式懋才猷。顯膺褒薦。過敦謙德。躬贊高文。兢懼靡遑。珍藏爲好。竊以長史薦士。蓋遵著令之文。小官求知。將應有司之格。然在下者常艱于際可。居上者亦歎于才難。苟蒙特達之知。亦謂非常之會。伏惟某官。溫恭飭己。道德承家。老成之典刑具存。正始之風流猶在。青衫手版。共歎棘棲之鸞。命衰貂冠。茲爲鴻漸之

翼。既深感愧。又切頌祈。

疏

三天洞求雨疏

伏以宣城之境。春末以來。雨施不時。稻未得種。父子熟視而無告。官吏不知其所爲。凡曰有神。靡不致禱。豈德薄莫能感格。抑民災未易祓除。莽大澤與高原。赫炎風兮畏日。恭惟禪師。具千乘眼。得一佛乘。無有親疎。等加悲憫。護衆生如赤子。觀此世如掌中。則夫鬱興大雲。普降甘雨。宜翹足可待。實伸臂之勞。其在神通。蓋甚容易。眷茲千里之澤。請以三日爲期。時或有愆。事且無及。

三天洞謝雨疏

維清淨心。雖于三界無所著。以慈悲故。常憫一切諸有情。頃以旱災。輒伸誠禱。卽時感達。應念雨來。變饑饉爲豐穰。易煩惱爲歡喜。願茲恩施。曷有報償。哀民生之多艱。願眞乘之卒相。俾無失望。是謂大慈。

柯山集卷四十八

祝文

祭社文

某受命于朝。來守此土。宣上之德。以保有民。社惟神之功。百世通祀。幸得以時。躬薦牲幣。徼福于民。莅事之始。敢敬致告。惟神鑒之。

祭稷文

惟神之功。立我烝民。有邠之君。實興周室。萬世通祀。光配無極。某受命天子。來長斯民。歲時奉祭。牲幣有秩。莅事之始。敢告有常。神其鑒之。永錫斯土。

祭文宣王文

惟吾聖師。生于此。又嘗仕于此。蓋自衛而刪詩定樂。既沒而葬。皆在此也。教之在魯深矣。某受朝命。來守此土。意遺風逸禮。必有在民。願與諸生究觀而講明之。莅事之始。敢不致告。非以爲禮。庶用致虔。

敬亭廣惠王求雨文四首

嗟乎吾民。其困久矣。去歲積雨。大江橫流。兩圩旣隳。一境受弊。補復亡散。實在今年。死生存亡。間不容髮。

而自春及夏。時澤未滋。芄芄四郊。稻且不植。吏術莫救。必神之求。神食斯民。忍視其疾。惟王威靈功德。烜赫在民。指揮蛟龍。震作雲雨。一瞬之力。豈或難之。

山川之神。能出雲氣。見變怪。以司雨暘之權。以佐民衣食之用。則是有職于民者。故朝廷隆以爵號。表以廟貌。有司歲時奉祀不絕。自四月至今。以旱禱于王者。于是三矣。今事已益急。雖瀆神有罪。而不敢避也。惟王俯而聽之。油然而雲。沛然而澤。以除民之病。以紓吏之責。于王之神。警欬之力。有職于民。宜不愛惜也。

宣之爲州。被山帶江。民耕于高。無灌溉之利。而仰澤于天。故閱月不雨。則以旱告。今茲季夏之初。時雨大至。諸山之田。旣植且茂。比日乏雨。積水且竭。亦嘗雨矣。然方作而止。又不徧也。是以民心惶惶。憂在歲事。吏無以爲術。但知有謁于神而已。夫困廩之有。將入手而取之。稊稗之食。將下咽而奪之矣。抑又神之所不忍也。

南方之民。以稻爲命。而稻非水不植。神所知也。今茲四月且盡。而原田槁乾。待水種稻。而雨不降。澗溪之流。亦復淺涸。民情惶惶。如失火之待水。寒疾之待汗也矣。今不種。則一歲且無食。其飢餓死亡。流轉于溝壑。可立而待。則其憂懼危迫之情。蓋可知矣。乃茲月甲申。嘗率僚屬有禱于神。神如答之。翌日而雨。然施澤未渥。雲日已霽。豈神未念民之病。姑以塞其意而已耶。審如是。其繼有請。雖十百其未止也。神雖欲罪其瀆而降之罰。亦末如之何矣。今事已甚迫。敢盡布之。惟立興風雨。一雨三尺。其于農事。乃克有濟。某亦

有不腆之牲酒。以報神之德。惟王速圖之。

廣惠王祈晴文

請雨未幾。又復謁晴。在人宜怒。况神之靈。沃野茫茫。歲將有秋。誰爲之孽。雨淫不收。失望垂成。吁嗟憫憂。不敢避瀆。冒昧有求。神或哀之。疾尙可瘳。

靈濟王求雨文三首

惟王昔以功德。受國爵命。袞服南面。抗儀王者。可謂盛矣。數州之民。奔走奉祀。以時不懈。積有年矣。受國爵命。則如有位于朝。食民奉祀。則如受祿于國。然則其可不察民之利病。與之同憂樂哉。今民之大憂。王亦知之矣。乃自春末至今。時雨不降。仲夏而稻不得種。一方之民。拱手而待饑饉。甚可哀也。而王之威靈光烈。烜赫甚著。其于蛟龍以致雲雨。且無所難。夫爲所不難。以解民之大憂。以是致禱。當在所答。今早已甚。非沛然大雨。則于農事猶無所補也。若夫苟施微澤。姑以塞其意。而曰吾嘗雨矣。則非某之所敢知也。

水旱有數。尙憂堯湯。聖無如何。矧此一方。人治其陽。數之所拘。神造數者。可得卷舒。戊戌有請。逮今未至。神之威靈。胡難其易。旱野童童。塵生溝澮。神其鑒之。賜以滂沛。

自夏徂秋。謁雨于王者數矣。豈惟厭之而不答。將怒其瀆而降之罰也。某則謂之不然。求者以不隱爲情。施者以不倦爲仁。譬之君親。求則謁之。何瀆之嫌。爲之君親者。視其所求。可則與之。何倦于數。用是輒有

請于王而不疑。惟王威德烜赫。臨此一方。吏民奉事。歲時不懈。則其有請。尤在所答也。

靈濟王祈晴文

徹救旱之奠。曾未逾旬。陳止雨之辭。則已在廟。不修人事。惟神之求。罔忌威靈。其瀆已甚。罪不能脫。誠或可通。今茲多稼。旣成。敗于將穫。積水且溢。決則不支。始幸倉廩之將盈。俄憂父子之不保。盛德未竟。大恩宜終。夫呼而爲風雲。吸而爲開霽。于神無費。庶禱必從。

景德寺祈晴文

伏以雨旣時若。歲將大熟。而陰霖不止。水潦將增。大懼隄防之圯墮。偃漑之墊溺。欲除民病。惟賴佛乘。伏望消伏陰魔。開通慧日。拔幽沉爲明達。變苦惱爲歡謠。衆生之疾旣除。能仁之願亦滿。

祭天齊仁聖帝並城隍祈雨文

比以旱故。禱于一二神。幸時雨之沛施。免斯民于饑饉。而誠薄未格。報至不時。豈媚于神者有未至耶。抑在茲境者或不舉也。今旱旣甚矣。民亦殆哉。莫知所爲。惟有致禱。謹遣僚屬。徧詣祠宮。於赫有神。時賜甘沛。惟民與吏。皆獲卽安。牲酒馨香。將以爲報。

廣惠王謝雨文二首

禱旱壬寅。雨旣隨至。匪亟匪徐。澤此厚地。旱野千里。稻如雲浮。農人笑歌。以樂易憂。哀此困窮。神德之厚。躬羞菲薄。吏則何有。我聞仁者。施不責償。鑒其誠悃。臨此一觴。

一歲薦禱。我顏則羞。神乃哀之。輒與所求。問我農夫。我田既臧。無有高卑。均爲豐穰。父子相保。鰥寡有依。守臣何功。神則與之。牲酒瘠酸。報微施豐。惟誠與潔。庶以薦衷。

靈濟王謝雨文二首

間者有禱。實以亢陽。神答其誠。翌日沛滂。風駕雲旗。飛澤淋浪。應龍翔嬉。妖魃奔忙。靄靄田原。萬畦齊秧。父老相慶。豐年有祥。牲酒微薄。愧升廟堂。抑神之仁。豈責報償。頃以旱故。遣吏致祈。其慢宜罰。神顧聽之。獵獵風雲。來自東南。協氣橫流。妖魃奔潛。溝澮畢通。高卑具沾。活此一方。老稚舞歌。守臣冒功。幸此時和。牲酒不腆。匪以報德。光揚威靈。傳示無極。

祭魯恭王文

惟王託體聖父。奄宅龜蒙。龍旂旄鉞。天子之容。文物焜煌。照臨東國。一有八年。榮寵之極。臨終上書。以禮自克。千載讀書。猶懷感惻。茲惟舊封。爰有廟食。荒榛喬木。薦享寂寂。時有農父。來祈黍稷。坎坎擊鼓。剗豚布席。雨暘疾癘。求無不獲。愛人之心。千古不息。某具舟楫。將寄潁尾。漂泊五年。未知攸止。吾道非耶。乃底于是。悠悠天道。惑之久矣。再拜祠下。神鑒其志。行旅之薦。不及酒馘。

祭聖帝文

貶逐積年。窮無所愬。而聖上哀其不辜。復畀之民社。而來守此邦也。則亦惟是旱乾水溢之不時。將有請于帝。帝之仁民。宜無或難。莅事之始。敢以告。姑以致虔。禮則已略。惟帝鑒之。

祭文

祭成都李龍圖文

嗚呼公擇其中退然如不勝衣而能爲人所不能爲在熙寧初政有大議柄臣持之一壓以勢公奮力爭與相抵刺厥聲凜然卒擯于外流落十年天子思之歸卿太常君子之喜於穆聖后緝熙于學公侍講讀以開以覺正位地官幹邦盈虛持國風憲匪激匪紆嗚呼公擇孝友烝烝祿富族親妻孥無贏死不能喪圖書在籙施于朋友孔燕豈弟曠無累心清有遺味公去朝廷大旆高牙孰云來歸哭引喪車旦夜死生不足歎嗟善人存亡實繫邦家叙哀一觴其飲之耶

代范樞密祭司馬溫公文

嗚呼天祚有邦畀之元龜篤生我公爲世父師夷齊之清淵騫之德子產之惠叔向之直人擅其一足以成名公兼衆德乾乾不寧九流百家金匱石室鈎索沈隱裁其失得根柢治亂經綸皇極作爲文章有書秩秩元圭大裘望之肅然冬陽夏冰赴者爭先仁英兩朝鏗鏘厥聲國有正人折姦于萌荏染者木求直于繩我公盡規君心則寧烈烈神考體貌有德公獻其可巖巖翼翼言有未用不敢受爵深衣幅巾歸休于洛公則休矣四方顒顒君子野人泊于他邦聞者懷歸于父子兄天施不齊或怨寒暑公獨何施四海一譽元豐末年國有大事穆穆文母宥我神嗣爰立作相媚于神人我公在廷其重萬鈞士賀于朝民歌

于廩農慶于野兵休于邊燠爾慄寒養其飢孱無瘠于饑無禾于田培其本根枝葉則茂豈曰我作憲章
惟舊於赫聖考左右上帝休公于家實遺聖子卷耳思賢夙夜周京不惑不疑成此太平公之去來人之
戚嬉人之戚嬉帝之從違豈人事耶天實爲之純仁不才辱公知深人之相知貴相知心惟公我知洞達
表裏采其所長謂或可使申結義好邱山不移匪我則然公實取之泚泚清洛獨樂之園嘉華春敷修竹
夏寒海酌翛然我招我從琅琅喜言有銘在躬朝偶乏人備位樞機入與國論獲親風規六七年間爲益
不貲私祈白首從公以歸憂勞傷生公既遘疾庶幾有瘳卒相王室國祠既誓公以喪聞我心之悲不獲
至門入哭于室公既大歛終天之情不一見面人生有死如旦夜耳曾子將沒知免而喜公身既修公志
既畢既壽令終無有其失有如公者古今萬一任重道遠稅駕茲日庶幾念此以紓我悲猶有鬼神實聞
我詞

祭劉貢父文

嗚呼子之強學博敏超絕一世肇自載籍孔墨百代太史所錄俚閭野記延及荒外陰陽鬼神細大萬殊
一載以身下至律令老吏所疑故事舊章在廷不知有問于子歸如得師直貫旁穿水決矢飛一時書林
衆俊並馳滿堂賢豪視子塵揮逸足奇毛不受綈羈擯守列郡吏民畏思治盜句冤不事誅斬他嚴見欺
子愛不犯中斥于南人憂子怡歸來白首晚職訓詞子之來歸亦既疾病惟其精明猶足以永誰云如子
竟止斯耶國失君子善人之嗟方其盛時弛不得張亦既有遭而盡其強誰與子仇敗子百方雖然今日